

Edizioni

- letto 710 volte

Aston

M'entencion ai tot' en un vers mesa
cum valgues mais de chant qu'ieu anc fezes;
e pot esser que fora mieills apresa
chansoneta, s'ieu faire la volgues,
mas chantars torn' en leujaria;
e vers, qui ben faire-l sabia,
es ben semblan que degues mais valer,
per qu'ieu hi vuoil demostrar mon saber.

Amors m'auci, tant s'es en mi empresa.
Greus m'es l'afans e-l trebaills on m'a mes;
tot n'ai perduto deportar e gaiesa
e, s'anc joi aic, era non sai que s'es.
De midonz cossir nuoich e dia,
midonz c'ai dich cum l'apel mia.
Dir' o puest ieu, puois mi ven a plazer,
mas ilh no·m vol ni·m deigna retener.

Mal esguardiei son pretz ni sa riquesa
qan l'enquisi, per que fui folla res.
Et aic ben dreich, c'una doussa franquesa
mi mostrava ab qe·m lasset e·m pres.
Gen mi sonava e·m rizia
qand ieu anava ni venia;
era m'a si tornat e non caler
q'apenas sol neis mi deigna vezet.

Ja non creirai q'ieu no l'agues conquesa
s'ieu valgues tant qu'il amar mi degues.
Ben sui doncs fols, car eu l'am, si be·il pesa!
Partirai m'en? Ai, dompna, non puosc ges!
Mas d'una ren vos pregaria,
que no·us fos greu, si no·us plazia.
Que nuilla res no·m pot del cor mover
lo desirier que tant n'ai en poder.

La gran beutat de lieis ni la dreitesa
non es nuills hom que trop lauzar pogues.
E mi que val s'ill es pros ni cortesa?
Qu'ieu muor per lieis e no·ill en pren merces.
Ben sui fols, qu'ieu ja trobaria
altra domna que m'amaria.
Ara sai ieu qe·l reproviers ditz ver;
?Totz temps vol hom so que non pot aver.?

D'amor mi plaing, mas de nostra marquesa;
sui mout iratz car la·ns tol Vianes.
Per lieis es jois mantengutz e proesa,
qu'es la mieiller dompna c'anc hom saubes,
ni autra non cre qu'el mon sia
que tant sapcha de cortesia;
c'apenas pot sos pretz el mon caber
qu'a totz jorns creis e no·l laissa cazer.

Lo vers es faitz qui l'aprendia.
En Peirols vol que sabutz sia
en Vianes, on pretz non pot cazer,
que·l marquesa l'i fai ben mantener.

- letto 738 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropaea.let.uniroma1.it/?q=laboratorio/edizioni-49>